

Gereformeerde Kerk Bellville – 30 April 2017 – Aand

Sing vooraf staande: Psalm 93:1, 4 (p. 470)

- 1 Die HEER regeer. Die kleed van heerlikheid / wat Hom omstraal, is enkel majesteit.
En deur sy krag, wat enkel triomfeer, / hou alles stand, dit wankel nimmermeer.
- 4 Al u getuig'nis, HEER, is gans getrou, / beloftewoord sal U vir altyd hou.
U tempel sal, wat ook om ons vergaan, / net soos u trou, onskendbaar bly bestaan.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Psalm 89:1, 6 (p. 444)

- 1 Van goedertierenheid sal ek vir ewig sing, / en aan u trou, o HEER, altyd my hulde bring;
want soos 'n tempel wat op vaste grond verrys het, / so rys die ewige guns wat U aan ons bewys het;
en soos die hemelboog nooit uit sy stand sal wyk nie / so seker sal u trou nooit wankel of beswyk nie.
- 6 Hoe salig is die volk wat luister na u woord, / hul wandel in die lig wat van U afstraal, voort.
Hul sal hul in u diens, waaraan hul toegewy is, / die ganse dag verheug, omdat hul in U bly is;
hul prys u grote krag wat alle krag oortref het, / en u geregtigheid wat hul weer opgehef het.

Gebed

Skrifberyming 5-3:1, 2 (Sb 8)

- 1 Aan U, o Lam van God, 'n nuwe lofgesang! / Want U is waardig om die wonderboek te^ontvang
en oop te breek – die boek van toekoms en verlede / en van wat word, geskrif van Gods
verborgenhede.
U's waardig, U alleen, omdat die werk volbrag is, / toe U as offer vir ons sondeskuld geslag is.
- 2 U 't van die hemel hoog op aarde neer wou daal, / en ons vir God gekoop uit alle volk en taal.
Die losprys was u bloed, wat U vir ons gestort het, / waardeur ons, rein gewas, 'n priestervolk
geword het
en konings in die ryk van onverstoorb're vrede, / om God te dien en eer in eind'lose^oewighede.

Skriflesing: 1 Petrus 1:13-25; Heidelbergse Kategismus, Sondag 13:34

Kernvers: 1 Petrus 1:18-19

Julle weet dat julle nie deur verganklike dinge, silwer of goud, losgekoop is uit julle ydele lewenswandel wat deur die vaders oorgelewer is nie, maar deur die kosbare bloed van Christus, soos van 'n lam sonder gebrek en vlekkeloos. (1 Petrus 1:18-19 AFR53)

Heidelbergse Kategismus

Vraag 34: Waarom noem jy Hom ons Here?

Antwoord: Omdat Hy ons na liggaam en siel van die sondes en uit alle heerskappy van die duiwel nie met goud of silwer nie maar met sy kosbare bloed tot sy eiendom verlos en vrygekoop het (a).

(a) 1 Pet 1:18, 19; 2:9; 1 Kor 6:20; 1 Tim 2:6; Joh 20:28.

Tema Jesus is die Christen se Here en hy is Jesus se eiendom

Geliefde gemeente van ons Here Jesus Christus, in die tweede artikel van die Twaalf Artikels bely die gelowige vier Name van die Seun van God. Hierdie Name is Jesus, Christus, eniggebore Seun en Here. Die gelowige het sy vraagsteller se vrae oor die eerste drie Name uitvoerig vanuit die Skrif geantwoord. Oor die laaste Naam vra hy net: **Waarom noem jy Hom ons Here?**

Aanvanklik klink dit na 'n enkelvoudige vraag, maar ons het al hierdie ongelowige vraagsteller leer ken. Agter so 'n enkelvoudige vraag het hy gewoonlik ander vrae wat tot hierdie een gelei het. Die Naam *Here* het hom aan twee goed laat dink wat hy ook in sy gesprek aan die gelowige noem. Omdat die vraagsteller van geskiedenis hou, lees hy graag en weet hy dat die Romeinse keisers as gode vereer is en ook as *here* aangespreek is. En die tweede ding waaraan hy gedink het, is dat slawe ook hulle eienaars as *heer* of *here* aan-spreek het.

Hierdie twee dinge waaraan die vraagsteller gedink het en uiteindelik gelei het tot hierdie een enkelvoudige vraag, kan soos volg verstaan word. Hy wil aan die een kant van die gelowige weet wat die Naam *Here* aangaande Jesus bekend maak en aan die ander kant wil hy weet watter posisie die gelowige het as hy Jesus dan *Here* noem.

Die Heilige Gees lei die gelowige om sy vraagsteller vanuit die eerste brief van Petrus te antwoord. Die mense vir wie Petrus hierdie eerste brief geskryf het, het geweet dat nie net Jesus as *Here* aangespreek word nie. Die naam *here* of *heer* is ook destyds deur die heidene gebruik om aan die keiser goddelike eer te bewys.

Die ontvangers van hierdie brief was Christene wat in die verstrooiing was. As gevolg van die vervolging van die Christene in Jerusalem en Judea moes hulle vlug na ander landstreke toe. In Jerusalem en Judea het hulle nog burgerskap gehad, maar as vlugteling in die landstreke waar hulle hulle tans bevind, is hulle net uitlanders. Hulle het geen regte gehad nie en om aan die lewe te bly, moes hulle hulleself as slawe verhuur aan die grondeienaars in daardie gebied. Hulle was dus ondergeskik aan die grondeenaar en het hom ook as *heer* aangespreek.

Die vrae van die vraagsteller is dus nie vergesog nie. Christene oor die eeue heen moes al vir hulleself uitmaak waarom noem hulle Jesus *Here*.

Broers, susters en kinders, wanneer 'n mens bely dat Jesus mense verlos en vrygekoop het, veronderstel dit dat hulle aan iets of iemand anders onderworpe was. Die gelowige bely dat Jesus **ons liggaam en siel van die sondes en uit alle heerskappy van die duiwel vrygekoop het**. Petrus skryf dat die gelowiges losgekoop is uit hulle **ydele lewenswandel wat deur die vaders oorgelewer is** (1 Petrus 1:18 AFR53). Vir die Joodse Christene het dit beteken dat hulle slawe was van die oorgelewerde gebruike van hulle voorvaders. Hierdie oorgelewerde gebruike het daarop neergekom dat die Jode van oordeel was hulle moes deur onderhouding van die wet hulle eie verlossing verseker. Deur die wet te onderhou, so het hulle geleer, kan jy jou sondeskuld by die Here afwerk. Maar dit is nie waar nie. Niemand kan sy sondeskuld by die Here minder maak deur die wet te onderhou nie. Dus, nadat 'n mens nou alles gedoen het wat die wet vereis, is jy eintlik steeds in jou skuld vasgevang. So is elke mens op aarde vasgevang in die skuld en die mag van sy sonde.

Nie een van ons was egter geharde heidene wat op 'n drastiese wyse tot bekering gekom

het nie. Ons almal het in ordentlik beskaafde en gelowige huise grootgeword. Maar ordentlik beskaafde en gelowige huise vrywaar 'n mens nie van die erfsonde nie. Van nature is ons almal in die mag van die sonde en onder die heerskappy van die duiwel. Ons word in sonde ontvang en gebore. Daarom is ons van nature geneig om God en ons naaste te haat. Ja, van nature is ons geneig tot alles wat boos is. Ons kan uit onself uit niks goeds bedink of doen nie.

Omdat ons van nature in die mag van die sonde is, is ons geneig om ook ons lewe volgens ons sondige begeertes in te rig. Dit is juis waarteen Petrus die gelowiges later in sy brief waarsku. Aangesien hulle uitgelewer is aan die giere en wispelturigheid van die grond-eienaars, moet hulle daarop bedag wees om nie kwaad met kwaad te vergeld nie. As iemand kwaad van jou praat, wees op jou hoede. Want as jy jou daarop gaan toespits om hom ook iets aaklig toe te snou, het jy toegegee aan jou sondige begeertes. Dan het jy gedoen wat jou natuurlike geaardheid van jou verwag.

En as 'n mens eers aan jou natuurlike geaardheid begin toegee deur jou sondige begeertes te gehoorsaam, laat jy toe dat die sonde en die duiwel weer oor jou baasspeel. En dit is verskriklik as die duiwel jou here en meester is. Hy is 'n harde baas wat jou van kwaad na erger dryf. Kyk maar hoe gaan dit in die mense se lewens wat hulle sondige begeertes aanhoudend gehoorsaam: die alkoholis, die dwelmslaaf, die seksmaniak, die magsbehepte mens, die ma-terialis vir wie geld en goed alles in die lewe is. Hulle is vasgespin in die strikke van die sonde en die duiwel se heerskappy sodat hulle met eie krag nie sy mag kan ontsnap nie.

Maar die Seun van God het na hierdie wêreld toe gekom om mense uit die kloue van die Satan te verlos. Op Golgota het Hy die duiwel 'n genadelose kopskoot toegedien sodat sy ryk nou aan die wankel is. Die mag wat die duiwel oor Christene gehad het, is deur Jesus verbreek. Daarom behoort Christene nou aan Hom en noem hulle Hom hulle Here. Alhoewel Christene uit alle heerskappy van die duiwel verlos is en van al hulle sondes vrygekoop is, beteken dit nie dat hulle nooit weer sonde sal doen nie.

Noudat Christus die Christene se Here – hulle Eienaar – is, beteken dit ook nie dat die duiwel hulle nie meer sal aanval nie. Onthou, die duiwel loop soos briesende leeu op die aarde rond en soek wie hy kan verskeur. Met allerhande slinkse planne sal hy gelowiges tot 'n val probeer bring en hulle sondige geaardheid kry nou en dan weer lewe. Want die ou sondige mens wil maar nog stry teen sy doodsvonnis en die Satan wil nie sy nederlaag op Golgota gelate aanvaar nie. Maar al gebeur dit nog dat Christene sonde doen, heers die Satan en die sonde nie meer oor hulle nie. Christene staan onder die genade heerskappy van Jesus Christus en in Hom is hulle meer as oorwinnaars.

In die eerste plek word Jesus dus deur die gelowige *Here* genoem, omdat Hy Hom losgekoop het van die sondes en uit alle heerskappy van die duiwel. Die prys wat God die Vader eis vir die lewe van 'n gelowige is die dood en Jesus het daardie prys ten volle betaal.

In die tweede plek wys die gelowige sy vraagsteller waarmee Christus hom vrygekoop en verlos het. In die destydse wêreld is 'n slaaf met silwer of goud van sy eienaar vrygekoop sodat die slaaf vry kan wees. Christus het mense ook vrygekoop van die verslaving aan hulle eie sondige geaardheid en van alle heerskappy van die duiwel. Maar Hy het dit nie met goud of silwer gedoen nie, hoe waardevol silwer en goud ook al vir mense mag wees. Wanneer dit by die betaling van sondeskuld kom, het goud en silwer geen waarde nie. Intendeel, die prys vir 'n mens se lewe kan nie in geldwaarde gemeet word nie. En omdat

die waarheid en geregtigheid van God eis dat die dood alleen genoegsame betaling vir die mens se lewe is, het Christus dan ook met sy kosbare bloed betaal om mense los te koop.

’n Hoër prys as die sterwe van Christus sal ons nêrens kan kry nie. Daarom sê Paulus ook op ’n plek dat ons duur gekoop is (1 Kor 6:20). Geliefdes, hoor net die liefde wat God die Vader en sy Seun Jesus Christus vir mense het. Die Seun van God was al voor die skepping van die wêreld deur sy Vader bestem as die losprys vir die gelowiges en die Seun was van ewigheid af bereid om Homself te offer sodat hulle vrygekoop kon word van die sonde en die duiwel. Op die bestemde tyd het Christus Homself dan ook oorgegee om gekruisig te word sodat sy broers en susters vry kan kom van die verslawing aan die sonde en die duiwel.

Hierdie verlossingswerk van Christus was nie ’n koue handelstransaksie nie. Vir Christus en die Vader was dit ’n daad van onbaatsugtige liefde. In hierdie onbaatsugtige liefde wat Christus en God vir mense het, hoor ons ook hoeveel waarde God aan sy kinders heg. Hy heg soveel waarde aan hulle dat Hy nie eers sy eie Seun se lewe gespaar het nie. Hy was bereid om die hoogste prys vir hulle vryheid te betaal.

En deurdat die Vader vir Christus weer uit die dood opgewek het, het Hy aan Hom die heerlijkheid gegee. Die heerlijkheid wat pas by Hom wat Eienaar is van God se kinders. Omdat Christus sover gegaan het om sy kosbare bloed as betaalmiddel te gee vir die gelowiges se vryheid, en omdat die Vader aan Hom alle mag in die hemel en op die aarde gegee het, maak God dit aan ons baie duidelik: Jesus Christus is die Here – die Eienaar van die verlose mense. Hy alleen voer heerskappy oor hulle, want deur sy dood en opstanding heen het Hy absolute besitreg oor hulle verkry.

In die derde plek dui die gelowige ook vir sy vraagsteller aan vir watter doel Christus hom verlos het. In Sondag 13 bely die gelowige dat Jesus hom losgekoop en verlos het om hom tot sy eiendom te maak. En omdat hy en alle ander Christene Jesus se eiendom is, noem hulle Hom hulle Here.

Alhoewel hierdie loskoop van God se kinders vir Christus nie ’n koue handelstransaksie was nie, kan ’n mens tog in handelstaal praat om die saak vir die vraagsteller verstaanbaar te maak. Wanneer ons iets koop en die volle prys daarvoor betaal het, is ons die wettige eienaars van daardie gekoopte voorwerp. Indien jy byvoorbeeld ’n voertuig gekoop het met die doel om dit vir lang afstande te gebruik, verwag jy ook van daardie voertuig om die soort werk te kan doen waarvoor jy dit aangekoop het.

’n Mens kan nou hierdie beeld toepas op Christus se eienaarskap oor die Christene. Hy het die volle prys betaal wat sy Vader geëis het sodat hulle vry kan wees van die verslawing aan die sonde en die duiwel. Dus, het nóg die sonde nóg die duiwel enige verdere seggenskap oor hulle. Christus alleen is die Christene se Here en Hy het nou absolute besitreg oor hulle. Omdat Hy hulle wettige Eienaar is, is dit tog verstane dat Hy wil hê hulle moet wees en leef waarvoor Hy hulle gekoop het, naamlik om kinders van sy Vader en broers en susters van Hom te wees.

Geliefdes, omdat ons glo en bely dat Jesus Christus ons ook verlos het, kan ons dit nog ’n maal sê: Omdat Christus ons uit liefde vir God losgekoop het met sy kosbare bloed, is ons die eiendom van Hom alleen. En aangesien ons sy eiendom is, rus daar nou ’n verpligting op ons. Ons moet leef en wees soos die eiendom van Christus en die kinders van God. Tog doen ons dit nie alleen uit pligsbesef nie, maar veral omdat ons dankbaar is dat Christus ons sy eiendom gemaak het.

In praktyk beteken dit dat gelowiges met hulle hele lewe moet en wil toon dat hulle nie die eiendom van die wêreld of van die duiwel is nie maar van hulle Here Jesus Christus alleen. Daarom sê Petrus: In plaas daarvan om ons lewe volgens ons ou sondige begeertes in te rig, gaan ons nou ons hele lewe heilig hou, omdat ons Eienaar en sy Vader heilig is.

Met ander woorde, met liggaam en siel, met hart, verstand en wil, met lewe en besittings, met man, vrou en kinders moet en wil Christene die Here Jesus en sy Vader alleen dien en sy heilige wil uitvoer omdat hulle aan hulle Here behoort. Jy wat dan deur Jesus verlos is gaan in alles wat jy sê en doen eers vasstel of dit God se goedkeuring sal wegdra. En eers as jy daarvan oortuig is, praat jy en doen jy. Dan leef jy 'n heilige lewe. En om so heilig te lewe, het Christus juis sy Heilige Gees aan jou gegee om jou as sy eiendom te beseël. Die Heilige Gees lei jou daaglik om die ou mens nog meer af te sterf en Hy wek die nuwe mens meer en meer in jou op sodat jy hoe langer hoe meer heilig kan wees en leef, omdat jou Eienaar heilig is.

Broers, susters en kinders, as ons almal saam kan bely dat Jesus Christus ons liggaam en siel met sy kosbare bloed van die sondes en uit alle heerskappy van die duiwel vrykoop en ons tot sy eiendom gemaak het, sal ons weet hoekom noem ons Hom ons Here. As ons Hom dan ons Here noem, bely ons met ons mond en glo ons met ons hart dat Hy absolute besitreg oor ons het. As dit vir ons waarlik 'n vreugde is dat Hy ons vrykoop het toe Hy ons Here geword het, moet en wil ons met ons hele lewe dan ook bewys dat Christus ons Eienaar is vir ewig.

Amen!

Slotgebed

Skrifberyming 5-3:4, 5 (Sb 8)

- 4 Die sondelose Lam, vir sondeskuld geslag, / is waardig om te ontvang die rykdom, wysheid, krag, en eer en heerlijkheid en dankb're seëninge! / En al wat leef en roer, al die geskape dinge op aarde en diep omlaag, of in die hoë hemel, / al wat die see bewoon en in sy dieptes wemel –
- 5 die ganse skepping sing met krag van jubeltoon: / “Aan Hom wat heerlijk is, hoog op die wêreldtroon, en aan die Lam van God, self eewige Skeppings-Here, / sy ewig lof en prys en krag en roem en ere!” Met “Amen, Amen!” het die géruks opgesewe. / Die oudstes het aanbid voor Hom wat ewig lewe.

Die genade van ons Here Jesus Christus, die liefde God die Vader en die gemeenskap van die Heilige Gees sal met elkeen van julle wees en bly.

Amen.

Ds Coenraad Vrey
Gereformeerde Kerk Bellville
30 April 2017